



Apeqqueteqaat aallaavigalugu oqallinnissamik siunnersuut, qanoq iliorluta ilinniartitsisut sulinermi atugaasa pitsanngortinnerisigut atuartut ilikkangaqarnissamut periarfissaat pitsannngorsarsinnaavagut.
(Inatsisartuni ilaasortaqaq Peter Olsen, Inuit Ataqatigiit)

Isumaqarpunga assortuussutigisinnaanngikkipput Meeqqat Atuarfiata ingerlalluartariaqarnera. Uanga isumaga naapertorlugu pissutsit assigiinngitsut arlaqarput. Taamaattumik allanut naleqqiullugu equngasumik ingerlanermut pissutaasoq ataasiinnaq tikkuarneqarsinnaanngilaq. Allatut ajornartumik nassuerutigisariaqarparput tamatta akisussaaffigigatsigu pissutsit pitsaanerusequmik ingerlallernissaat.

Aallarniutigalugu oqaatigilara meeqqat atuarfianni iluarsisassat angerlarsimaffimmik aallaaveqarmata. Pingaaruteqarpoq uangut angajoqqaatut qitornagut perorsassagatsigit atuartitsinerup nalaani tusarnaartassasut ajoqusersuinatik. Pingaaruteqarpoq angajoqqaat isumagissagatsigu qitornatta qusueqqallutik atuariatortarnissaat. Tassa imaappoq qularnaassavarput meeqqat innajaartittarnissaat. Pingaaruteqarpoq isumagissallugu qitornatta peqqinnartunik assigiinngiaartunillu nerisarnissaat nukiit nerisassanit pissarsiat ilisimasanik taarsernissaat. Aamma pingaaruteqarpoq ullut tamaasa qitornagut oqaloqatigisassagatsigit atuarsimanerisa qanoq innerat pillugu aamm atuakkerineranni ikiortassagatsigit pisariaqartitsippata.

Angajoqqaatut tamakku isumagisinnaagutsigit, taava nikeriangaatsiassaagut.

Atuarfimmi pingaaruteqarpoq ilinniartitsisut piareersarluarsimanissaat aamma atuartitsinerup meeqqanut pissanganartuunissaa. Ilinniartitsisutut suliamut pikkorissuunissaaq pisariaqarpoq tamannali aamma oqittuinnaanngilaq. Isumaqarpunga pingaaruteqartoq ilinniartitsisut nutaamik eqqarsartassasut isumagalugulu atuartunik susassaqartitsisarnissartik. Imaassinnaavoq apersungaatsiarneq aqquutissaasoq imaluunniit aalanerup timigissarnerullu atuartitsinermut ilanngunnissaa. Tamatuma kinguneranik atuartut malinnaanerulissapput taamaasillutillu atuartitsinermut akornngusersuiniarpallaarunnaarlutik.

Ilinniartitsisut eqqarsaatigalugit pingaaruteqarpoq atuarfinni tamani aqutsisoqarnissaa ilinniartitsisunut kaammattuilluarsinnaasunik. Tamanna pisinnaavoq tulluuttunut ilinniaqqinneq aqquutigalugu imaluunniit angusassamik toraagaqarluni ilinniartitsisunik aqutsisut oqaloqateqartarnissaat. Aqutsisut isumassarsianik tunniussaqaarsinnaasariaqarput aamma ilinniartitsisut atuartitsilluarnissaannut kaammattuisinnaasariaqarput. Taamaasiornikkut ilinniartitsisut sulinerat nuannernerulersinnaavoq, aamma atuartut atuarnerat pissanganarnerullunilu nikerarnerulersinnaavoq.

Siunnersuuteqartup oqallissaarummini oqaatigai atuaqatigiit amerlassusissaat aamma marlunnik ilinniartitsisoqartarnissaaq. Taaneqartut tamarmik soqutiginarluinnarput aamma qularutissaanngilaq,



nunarsuarmi pitsaaneroriaqqiffissaqanngitsumi klassini atuartut ikilineqarsinnaassajunnarsipput aamma fagini ilinniartitsissutigineqartuni ataasiakkaani ilinniartitsisut marluusarsinnaassajunnarsipput. Ajoraluartumilli qularutissaanngilaq aaqqissuussinerit taamaattut akisoorujussuummata aamma ajoraluartumik akissaqanngilagut. Taamaattumik allatut ajornartumik pingaarnersiuisariaqarpugut. Tassani Demokraatini isumaqarpugut soqutiginarnerpaasoq marlunnik ilinniartitsisoqarluni atuartitsineq qissimittariaqaripput, isumaqaratta aaqqineq taamaattoq kinguneqarluarnerussasoq - minnerunngitsumik sumiiffinni amerlasuuni atuaqatigiiaani atuartut amerlassusaat amerlanerpaaffissaasunit 26-nit ikinnerukkajummata. Klassimi ataatsimi atuartut ikilisarnissaat taamaasilluni sumiiffinni tamani malugineqarnaviannngilaq. Kisianni ataatsikkut marlunnik ilinniartitsisoqartarnek malugineqassaaq. Isumaqarpugut atuartitsinermut angisuumik iluaqutaassasoq. Atuartut ataasiakkaat piffissaqarfigineqarnerulissapput taamaasillutik atuartut ataasiakkaat pikkorissusertik tunngavigalugu ilinniartinneqarsinnaalissagaluarput. Tamatuma saniatigut aamma ilinniartitsisut klassimi atuartunik aqutsilluarnerunissaminnut tunngavissarissaarnerulissagaluarput ilinniartitsisut sulinerminni atugaasa nuannerulerlernerannik kinguneqartumik aamma atuartut ilikkagaqarnissaminnut periarfissarissaarnerulerlernerannik kinguneqartumik.

Taakkuugallarput Demokraatini oqallinnermut ilanngukkusutagut aamma neriuppugut oqallinneq pitsaasumik isumatuumillu ingerlanneqarumaartoq.